

四庫全書

集部

欽定四庫全書

石倉歷代詩選卷二百三十八

明 曹學佺 編

元詩八

虞集

趙忠簡公祠堂詩

至順二年春解州聞喜縣學用禮部符祠其鄉先生故宋丞相趙忠簡公公六世孫國子博士貧翁

求集作迎送神詩

山河邈悠宗國為墟騎箕來歸懷此故都鳴梟在樹饑  
鯁在渚閼宮不存公食無所董澤之陂有蒲與荷子孫  
具來式燕以歌瞻彼洛矣其水泱泱斯文在茲俾也可  
忘

賦贈節婦王夫人

汎汎淇水岸有佳竹閨門嚴嚴樂爾貞獨泛泛淇流岍  
有松舟閨門閒閒樂爾貞幽汎汎其右有堂孔阜娟娟

貞幽肅肅眉壽淇原有泉可濯可沿亨驚勺尊樂爾高  
年高年樂止亦有孫子式歌衛風以告國史

題商德符華山圖

昔祠雲臺館行穿御階栢夕陰嵐氣深重碧照行客獨  
訪張超谷漸覺岩險迫冰生玉井頭日射仙掌側豈無  
鐵鎖懸翻身若飛鶻恐煩華陰令不奈昌黎伯王事况  
有程車馬何忽忽流觀終南山周覽天府國爾來十七  
年欲往不再得山河想邈悠傷殘轉蕭索摩挲華山老圖

彷彿希夷宅高哉蓮花峰白雲澹秋色

正月十一日朝回即事

宮樹春陰合霓旌拂曙來天光臨閣道雲氣轉蓬萊  
晝漏沈沈鼓晨搏灑灑杯香霏簾底霧樂殷殿前雷  
祥瑞儀曹奏珍醇尚食催舞庭分鷺序効獻過龍媒  
融雪微生草輕風不動埃老人南極至王母上方回  
玉色何多喜金華得重陪裁詩賀新雨西閣待門開

書上京國子監壁

神京極高寒幽居了晨夜雷風無時發零雨每飄灑炎  
光不到地蕭爽度長夏大化漠無宰豈必事陶冶揚雄  
不曉事守道栖栖者玄經百無徵白髮謾盈把

至治壬戌八月十五日榆林對月

日落次榆林東望待月出大星何煜煜芒角在昂畢草  
樹風不起蛩蛸絕啁啾天高露如霜客子衣盡白羸驂  
斷餘棧嫠婦泣幽室行吟毛骨寒坐見星河沒驛人告  
晨征矐矐曉光發

詠貧士

老骨寒不寐夜長况聞風心悸危欲折跼蹐敗絮中雞  
鳴當晨參馬疥芻不充山童衣百鶉喚之愧匆匆求火  
掃木葉庭樹亦已空決起不敢怠曙光屋南東苟遂牛  
馬性歸放春草豐

又

歸蜀越關隴棧閣危登天適越河濟隔堰水文尺間饑  
寒迫旦暮舟車計茫然東家有一叟欲去初不言早朝

聽詔畢喚馬閭閻前童奴受宿戒向暖爭相先聞之嗔  
兒子我何為汝牽屨無千金買吾足安暇憐

題儋耳東坡載酒堂

翳翳儋耳城歷歷枕榔樹百年遺故丘新堂設賓酢清  
風海上至朝陽在庭戶丹山五色鳳覽德屢來下甘辛  
熟桂酒羅列雜諸蘋苾藜多子孫食飲祭先具蛟龍波  
浪深歸來風雨除

日出行



日出上城府日暮當蚤歸城門已擊柝出郭將焉依下  
馬投館人空垣月當扉涼風振庭樹巢鳥屢驚飛起坐  
搔白髮忽如霜草稀周公不復夢仲尼故沾衣老萊有  
孺色傳聞惟食薇求之事已晚徘徊行遊非

贈治冠者

車馬入隘巷言尋治冠師反闕不受客高坐哦詩書布  
衣不掩脛晝食甘藿藜冠成動經歲不售亦不辭我少  
好文章把筆無不為愧爾爰寂寞慎與當自茲

賦茅山道士雲松巢

昔年李太白廬山思結巢褰雲自天上和鶴止松梢道  
士潘閒遠高居古大茅誦經門卧虎看劒石眠蛟飛步  
脫鳬舄長吟吹鳳匏九江攬秀色許爾作神交

題薛外史瓊林臺

高臺積方石瓊林樹交柯晨光眩白雲夕景纏紫羅每  
聞樵子唱恐是仙人過塵世在足下豈能聞笑歌過海  
祇騎鶴開池還養鷺外史政瀟灑太白烏足多

金人出塞圖

海風吹沙如捲濤高為陴磧深為壕築壘其上嚴周遭  
名王專居氣振騷肉食湏飲田為遨八月草白風颼颼  
馬食草實輕骨毛加弦試弓復置橐今日不樂心慄慄  
什什伍伍呼其曹銀黃兔鶻明繡花鷓鴣小管隨鳴靴  
背孤向虛出北臯東海之驚王不驕錦韉金簇紅絨條  
按習久蓄思一超是時晶清天翳絕駕鶯東來雲帖帖  
去地萬仞天一瞥離婁屬望目力竭微如聞音鶯一掣

束身直上不回折遂使孤飛一片雲頃刻平蕪灑毛血  
爭誇得雋頓足悅旌旗先歸向城闕落日悲風起蕭屑  
烟塵滿城鼓微咽大帥要王具甘歡王亦欣然沃焦熟  
闕支出迎騎小鐵琵琶兩姬紅顰頰舞歌迭進醉燭滅  
穹廬斜轉艷皓月

題柯博士畫

磯頭風急潮水長蒹葭蒼蒼繫魚榜青山一髮是江南  
白頭不歸神獨往幽篁繞屋茅覆簷木葉脫落秋滿簾

買魚沽酒待明月定是黃州蘇子瞻子瞻文章世希有  
謫向江波動星斗夜投斷岸發清嘯栖鶻驚飛怒蛟吼  
圖中風景偶相似欣然揮灑春雲開坡仙應是思鄉里  
還化江東孤鶴來

為達兼善御史題墨竹

蜀道荒涼多古木篋簾千尺相因依小年慣見今白髮  
杜宇夜啼愁不歸老可嘗作陵州守古墨蛟龍多入手  
春雷每恐破壁去神鼎空令夔魃走丹丘越人不到蜀

脩葉何以能縱橫內府人家爛漫寫使可見之心亦驚  
江南御史龍頭客暫別那能不相憶知君深識篆籀文  
故作寒泉溜崖石

畫鶴

薛公少保昔畫鶴毛羽蕭條向寥廓通泉縣壁久微茫  
故物都非況城郭長鳴濶步貌閒暇解寫高情亦竒作  
田中芝草日應長石上松花晚猶落赤壁江深孤月小  
白雲野迥秋霄薄羣帝相從絳節朝八公許製黃金藥

誤嬰塵網跡易迷移召中洲夢如昨借懸索壁憶真侶  
忽有微風動林壑碧虛寥寥積雪高直過蕭臺絕栖泊  
御溝詩次宋顯大韻

御溝雪融三月初鳬鷺鴻雁總來居蒲萄水綠可為酒  
楊柳條青堪貫魚逶迤天河起箕尾滉漾雲海浮青徐  
舟前花落傍飛燕隄上風來濕舞裾翠輦時留金腰褭  
錦波不着玉芙蓉臨流宋玉偏能賦莫待東都客問予

李老谷

十轉山崦交九度沙磧溜始辭平漢曠稍接山水秀老  
病畏行役慰藉得良覲秋嶺晚更妍寒花晝如繡故園  
夫如何朝陽眩霜袖

高竹臨水上

高竹臨水上幽花在厓陰以彼貞女姿當此君子心春  
陽不自媚夕露忽已深湘妃昔鼓瑟悵望蒼梧岑

月出古城東

月出古城東海氣浮空濛車騎各已息宮闕何穹窿牧



馬草上露吹笳沙際風帳中忽聞雁傳令鼓雕弓

泰定甲子上京有感次韻馬伯庸待制

翰音迎日轂儀羽集雲路寂莫就書閣老大長郎署為  
山望成岑織錦待盈度我行起視夜星漢非故處

賦水木清華亭

中流泛蘭桹望彼嘉樹林落日蕩野水浮雲生夕陰遊  
魚戀芳藻好鳥鳴幽岑為樂恐易老吾將脫朝簪

赤城館

雷起龍門山雨灑赤城館蕭騷山木竦浩蕩塵路斷魚  
龍喜新波燕雀集虛幔開戶微風起倚杖衆雲散

同閣學士賦金鴨燒香

黃金鑄為鴨焚蘭夕殿中窈窕轉斜月逶迤動微風綺  
席列珠樹華燈連玉虹無眠待顧問不知清夜終

退直同柯敬仲博士

月下白玉階霜生黃金井疎條栖鵲寒衰蕙流螢冷戀  
闕感時康懷歸覺宵永晨鐘禁中來白髮聊自整

送良上人賦得井上桐

桐陰秋轉薄，井氣曉為霜。  
交柯舞幽鏡，墜葉響鳴璫。  
高巢翠羽下，澄水玉虬藏。  
上人從定出，行吟遶石牀。

趙千里出峽圖

巨舟臨峽口，衆士志如一。  
各以所操濟，雖危萬無失。  
所憂在平曠，玩肆生縱逸。  
母婢持釣翁，倚岸三歎息。

哀童子

南山有鳳雛，飛來上林樹。  
祗承朝陽輝，不食秋夕露。  
珠

零海氣盡壁毀月光曙巫陽不能招荔丹滿洲嶼

于仲元舍賦紅梅

白雪不成夜丹霞遂崇朝妙質承日映飛英向風飄醉  
來紅袖近歌罷綵雲消揚州問何遜寧似董嬌嬈

寄幻庵主者

朝遊武夷麓暮入匡廬岑放舟臨野水采藥過幽林清  
泉磨寶劒磐石鼓瑤琴臘月歸溪上還作蚤春吟

應制題王拙畫吳王納涼圖

雨過大湖上風生響屨廊紅綃拂几席白紵製衣裳朱  
光淪厚地明月在高堂何以保玉體長年樂未央

送吳子高

懷寶獻京國悼亡還獨歸日落雲中樹風吹江上衣湘  
靈瑟在席織女石支機遠道多寂寞強飯勿相違

步虛詞

步虛長松下流響白雲間華星列燿火明月懸珮環肅  
然降靈氣穆若愉妙顏竹宮澹清夜望拜久乃還

其二

稽首望太霞  
離羅間層霄  
綢緼結冲氣  
要眇出空謠  
前參于景精  
後引務猷收  
攝衣上白鶴  
招搖事晨朝

其三

朱光出東海  
高臺迎赫曦  
六龍獻陽燧  
九鳳保金支  
鍊丹軒轅鼎  
濯景崑崙池  
拜賜冰玉佩  
玄洲共遨嬉

題商學士畫

方士好服食  
商山多紫芝  
采之長松下  
濯以清澗漪  
滄

涼百里內秦皇都  
不知駕舟載男女  
築宮東海涯

記子昂

春風動葉蘭庭戶  
光陸離言收竹上  
露石角掛練衣車  
行不擇路米以何  
楚楚遊子憺忘歸  
徘徊歲云暮

贈鐵菴道士

昔遊雲臺觀  
山色上衣青  
松花春雨落  
栢葉秋露零  
飢來煮白石  
睡起看黃庭  
人間忽已老  
莫問少微星

其二

海上別妻子山中求茯苓白虎戲玄渚蒼龍護黃扁燒  
香招五老行厨庖六丁從子似非遠丹霞粲華星

送張兵部孟功巡河分韻得屋上烏

花發上陽春門開未央曙城柝起羣栖流光散朝羽息  
影須近檐結巢願當戶輓轡轉金井終日灌嘉樹

林臯亭

九月天氣肅鶴鳴在林陰使君甚好客來者總能吟紅  
樹秋山近黃華夕露深隣翁八九十有酒即相尋



送先隴二隣僧還吳

蘭若背山陰松筠夾逕深  
門閒容虎卧湖近聽龍吟  
雨過泉添澗風飄磬出林  
衲衣皆舊識一一謝幽岑

其二

東崦憶招提幽尋日未西  
過山隨虎跡倚石待猿啼  
雲外催歸錫松間覓舊題  
卜隣吾欲老母惜伴扶藜

諼草生竹間

諼草生竹間翠色相綢繆  
美人欣有託君子故忘憂  
昔

聞有鳳鳴飲水來丹丘不食衆木實樂只淇園秋

雪谷早行

積雪擁柴門行人稍出村溪頭或遇虎木末不聞猿接  
棧迴山閣支橋就樹根驅車上重坂回首見朝暾

送人之劒閣倅

往年登劒閣騎馬著春衫設險懷前賦摩崖覓舊劉鄉  
人遊雪界郡倅試冰銜歸道觀新政春江不掛帆

漫興

雨閣添衣潤風簾隱几高白頭更事少病日向書勞南  
客傳音信東家問酒醪江邊茅屋破歸楫若為操

寄丁邠進士薩都刺天錫

江上新詩好亦知公事閒投壺深竹裏繫馬古松間夜  
月多臨海秋風或在山玉堂蕭爽地思爾佩珊珊

送長沙守

白髮長沙守循良又好文近辭金馬去遠有玉魚分對  
竹聽湘雨開簾看嶽雲漢廷思賈誼一飯莫忘君

代衆仲作

昔在泉州住將軍每見招春雲山對屋夜雨水平橋池  
鴨穿荷葉溪魚上柳條禁城鐘漏起車馬晚蕭蕭

寄莆田先生

懸榻塵生席深居晝下帷齊眉安饋食擁髻近歌詩藥  
裹須鍾乳書題憶荔支白頭吟更苦何必蜀人思

鄭谷圖

道士徐太虛生紙畫山居林壑春烟裏桑麻夜雨餘過

橋九節杖連屋一牀書似是子真谷歸耕三月初

題沈肩吾縣令贈行卷

縣庭都禁謁祇許見諸生接壤皆興學遊民亦願耕絃  
歌居室迥山水畫圖清千載雲巖石能留令尹名

八月八日有感題視草堂壁

載筆趨雲閣探囊索縕袍坐銷秋日淨心折夜風高識  
字頭先白謀生計轉勞文園多病渴常想賜蒲萄

戲作試問堂前石

試問堂前石來今幾十年衰顏空雨雪幽致自風烟微  
醉寒堪倚孤吟靜更眠舊湖春水長誰繫釣魚船

次韻馬伯庸少監二首

移蹕宮城曙烟花繞閣重來王俱屬籍稱使不傳烽賜  
席還親問囊書更手封恐煩宣室召眊日轉蒼龍

其二

臣甫多愁思長歌拜杜鵑鑿厓通閣道積水放樓船惆  
悵霜橫野棲遲雪滿顛經行看宿草碧色自年年

送王照磨之官雲南

遺妙珍珠浦歸舟  
焚道溪飛鳶愁暑  
雨走馬畏山泥宮  
署尊丹鷺祠官勝  
碧鷄題詩遠相送  
紅日五雲西

送魯子翬廉使之漢中

封上頒臺禮輕車  
入漢中節毛吹渭  
雨木葉動秦風把  
酒臺基古馳書歲  
事豐朝回倚西閣  
日日數歸鴻

立春夜試墨

輕雪作春花飛來  
入髻斜紫貂迎曉  
霧絳蠟炷晴霞書

詔頻趨閣思歸即借車幾時將稚子隨意踏江沙

湛湛行

湛湛天宇玄以黝星白如銀垂近人牛羊散漫草多露  
大帳中野傍無隣去年八月羽書急婦女上馬小兒泣  
今年八月天子來身屬橐鞬月中立

子昂墨竹

吳興畫竹不欲工腕指所至生秋風古來篆籀法已絕  
止有木葉雕蠶虫黃金錯刀交屈鐵天陰作雨山石裂



蛟龍起陸真宰愁雲暗蒼梧泣湘血

吳郡陸友仁得白玉方印其文曰衛青臨川王  
順伯定以為漢物求賦此詩

將軍騎從公主時豈意刻玉為文章珠襦已隨黃土化  
此物還同金雁翔軍中只識長平侯西風木葉茂陵秋  
人生卑微何可忽碌碌姓名誰見收

寫廬山圖上

憶昔繫船桑落洲洲前五老當船頭風吹雲氣迷谷起

霜墜楓葉令人愁  
高人抵在第九疊  
太白一去三千秋  
石橋二客如有待  
裹茶試泉春巖幽

題金馬圖

賈胡自騎千金馬  
解囊少憩荒城下  
平原無樹起秋風  
夢入陰山雪橫野  
太平疆宇大無外  
外戶連城無閉夜  
不然安有獨行人  
懷瑤安眠如晝者

白翎雀歌

烏桓城下白翎雀  
雌雄相呼以為樂  
平沙無樹托營巢

八月雪深黃草薄君不見舊時飛燕在昭陽沈沈宮殿  
鎖鴛鴦芙蓉露冷秋宵永芍藥風暄春晝長

題灤陽胡氏雪溪卷

積雪平沙山陰道射虎殘年不知老豈識船如天上坐  
翠竹為帷樹為葆昔乞鏡湖苦不早白髮如絲照清潦  
他年此地若相逢應著漁簑脫貂帽

送袁伯長扈從上京

日色蒼涼映赭袍時巡母乃聖躬勞天連閣道晨留輦

星散周廬夜屬橐白馬錦韉來窈窕紫駝銀甕出蒲萄  
從官車騎多如雨祇有揚雄賦最高

代祀西嶽至成都作

我到成都纔十日駟馬橋下春水生渡江相送荷主意  
過家不留非我情鸕鷀輕筏下溪足鸚鵡小窗知客名  
賴得郾筒酒易醉夜深衝雨漢州城

贈星上人歸湘中

潭北湘花無影樹一花吹度海門潮天香滿室足初起

雲氣上衣身欲飄寶月夜寒龍在鉢銀河秋近鵲成橋  
豈無半箇邛州竹與爾松根共寂寥

歐陽元功待制入院後僕以兼領成均辰酉甚  
嚴絕不得相見今夜當同宿齋宮賦此先寄  
并東謝敬德脩撰

學省初兼禁直稀故人同署却相違食餘苜蓿承朝日  
坐候棠梨過夕暉預喜奉祠秋寺燭定知催襍早朝衣  
今晨瘦馬經門巷想擁青綾尚掩扉

次韻張蔡國公淡菴青山寺詩

相國觀山負夙期聖恩祇許暫相違身隨雲影留三宿  
心了泉聲絕百非開士談空依寶樹野人耕雨薦山薇  
雙龍深護安禪處繞坐諸天近紫微

題南野亭

門外烟塵接帝局坐中春色自幽亭雲橫北極知天近  
日轉東華覺地靈前澗魚遊留客釣上林鶯轉把盃聽  
莫嗟韋曲花無賴留擅終南雨後青

閒閒宗師和前韻期望過當復用前韻以謝

草堂長憶蜀西郊屢卜歸休自折茅  
司馬檄傳驚父老少陵詩苦入神交  
山多美竹深宜屋江有嘉魚致遠庖  
乞得閒身當早入堯時元自有由巢

賦碣山成簡卿心遠亭

作亭臨河河水渾草樹繞屋啼鳥聞  
夢回枕上彭城雨目送檐間芒碣雲  
歸來黃菊有佳色坐老青山無垢氛  
但願樽中長得酒曲阿休問舊參軍

次韻朱本初訪李溉之學士不遇

城南城北暖塵飛，伐木相求苦未歸。  
吟到碧桃還細雨，行尋芳草又斜暉。  
綺窗綵筆題詩徧，斗帳沈香入袖微。  
共載小車勝上馬，重遊莫待曉紅稀。

寄題子敬平章

聞道乘閒入翠微，猶愁嵐氣濕人衣。  
道傍野樹飛花盡，溪上春雲作雨歸。  
故舊釣絲輕在手，仙人棋局靜忘機。  
赤松曾許同千載，擬向高秋傍鶴飛。



題暖翠亭

老去惟思卧白雲一亭新竹喜初聞  
波回曉日鴛鴦並沙散晴烟翡翠分  
把釣左泉歸趙女乘舟北渚望湘君  
誰能獨采薇盈袖却道高寒思不羣

寄來鶴亭主人

德清舊館何時到雨後春泉定滿池  
綠字久無引景信紫苔長應少霞碑  
數峰烟樹天垂野千頃鷗波雨散絲  
海內交遊多老去為誰溪上放船遲

其二

荔子枝頭火向紅  
高堂紈扇坐薰風  
湘筠簾冷魚波合  
海柏梁深燕雨通  
絡緯宜知秋袂薄  
戾屢長憶曉餐同  
入城來看花如錦  
誰道清霜解惱公

謝書巢送宣和瀘石硯

巢翁新得瀘石硯  
拂拭塵埃送老樵  
毀壁復完知故物  
沈沙俄出認前朝  
毫翻夜雨天垂藻  
墨汎春水地應潮  
恐召相如今草檄  
為懷諸葛渡軍遙

觀著色山圖

江樹重重江水深  
楚王宮殿在山陰  
白雲窈窕生春浦  
翠黛嬋娟對晚岑  
宋玉少時多諷詠  
江淹老去倦登臨  
扁舟却上巴陵去  
閒聽孤猿月下吟

白雲間上人度夏

白雲長傍太湖飛  
忽向西山度釣磯  
彭蠡小龍邀共飯  
潮陽仙客憶留衣  
筓因春雨朝朝茁  
橘待秋霜顆顆肥  
我自本名無所住  
經函松下共柴扉

甲戌四月十七日至臨川冲雲寺

郭西寺門雙石頭水鑑相對林塘幽白花過雨落松暝  
黃鳥隔溪鳴麥秋衰朽虛蒙宣室問淹遲實愛小山留  
為貪佛日同僧話滿袖香烟念舊遊

李伯宗錄詩

老去逢春祇謾吟煩將彩筆為追尋玉堂天上成塵夢  
茅舍山中稱野心萬里雲霄歸鳥盡孤村風雨落花深  
文章傳世知何用空使高情慨古今

周昉畫美人圖

島上雲生日轉欄  
海風吹面暮寒尖  
春明玉色遺香澤  
夜定珠光入鏡奩  
織得鴛鴦成綠皺  
教成鸚鵡啄紅甜  
試令鼓瑟應無語  
目斷歸帆思未掀

賦雪洲

江上經年憶雪多  
長洲化作玉坡陀  
舊時射虎迷蹲石  
薄暮歸漁認擁蓑  
河伯作宮龍獻璧  
湘靈遺珮鳳停梭  
鳬鷺容與江花發  
更待春來生水波

挽文山丞相

徒把金戈挽落暉  
南冠無奈北風吹  
子房本為韓仇出  
諸葛寧知漢祚移  
雲暗鼎湖龍去遠  
月明華表鶴歸遲  
不須更上新亭望  
大不如前灑淚時

張道士蜀山圖

碧玉參天是蜀山  
舊曾飛步歷孱顏  
松風上接空歌外  
蘿月長懸合景間  
試劍丹崖秋隼疾  
濯纓清澗夜龍閒  
君家虛靖歸來日  
冉冉蓬壺為憶還

題故太子少傅翰林承旨李公幽居圖

車蓋歸來托遠林，魯山薺萃魯源深。  
漁樵相識頻分席，賓客時過共賜金。  
百歲儀刑猶近古，五朝文物至于今。  
披圖想見登臨地，松滿徂徠起夕陰。

賦張志甫八十

身閱昇平近百齡，顏如玉雪鬢如星。  
遠移湘竹堪扶老，舊種蒼松已茯苓。  
頓見大官躬致饋，蚤令掌故口傳經。  
古來名士多肥遯，偏與題詩歷下亭。

畫扇雀竹

啄粟野田暮飛鳴亦求雌誰家江上雨發船歌竹枝

題敬仲雜畫

雨過黃陵廟蒼梧雲正愁何時倚虛幌對此滿林秋

竹塢沙頭鷗鷺

蝴蝶飛來石竹叢羅襦曾試繡文重荷花啼鳥銀屏外  
卧看窗間唾碧茸

錢舜舉折枝芙蓉



白髮多情憶劒南  
秋風溪上訝春酣  
剪來一尺吳江水  
比擬千花濯錦潭

商德符小景

五老峰前數往來  
紫雲如蓋蔭崔嵬  
十年京國頻看畫  
最愛高僧坐石苔

子昂幽蘭脩竹

舊時長見揮毫處  
脩竹幽蘭取次成  
欲把一竿苔水上  
鷗波千頃看雲生

送上黨長

春雨人參長紫苗  
縣庭無事坐終朝  
俯看雲氣千山表  
野有新田市有謠

題柯敬仲雜畫

夢裏江南憶舊遊  
明璫翠佩不勝愁  
一鉤纖月清如水  
吹笛何人共綵舟

子昂蘭石

汀草離離石老蒼  
行吟何處樂清狂  
江中遺佩相思久

莫待明年春歲長

題柯敬仲畫

牽牛引蔓上棠梨上有幽禽夜夜栖  
自是秋風動脩竹江南落月不須啼

題蔡端明蕪東坡墨蹟後

祇今誰是錢塘守頗解湖中宿畫船  
曉起鬪茶龍井月花開陌上載嬋娟

三生石上舊精魂邂逅相逢莫重論  
縱有繡囊留別恨

已無明鏡着啼痕

能言宿習妙蓮華贏得春風對客誇  
乞食衲衣渾未老  
為題靈塔向金沙

聽雪軒

樓前宿鷺起星河近歲江南雪轉多  
投老鐘山寒不寐  
滿山松竹夜如何

臘日偶題

舊時燕子尾毵重覓新巢冷未堪  
為報道人歸去也

杏花春雨在江南

題扇與周幹臣

玉疊松花蜜餅香  
龍珠星顆露盤涼  
遙知環碧樓中坐  
翠竹蒼松夏日長



石倉歷代詩選卷二百三十八

欽定四庫全書

集部

石倉歷代詩選卷二百

三十九  
四十

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣葉蘭

謄錄監生臣姚元娘

欽定四庫全書

石倉歷代詩選卷二百三十九

明 曹學佺 編

元詩九

吳澄

送楊志行赴閩海照磨效其體

負疴出京華息擔憩江介邂逅玉雪姿乘坡塵鷺外嘉  
名昔屢聞良覲今一快談諧每欣豫晨夕數期會藉此

慰羈孤明然倏離北天書下司泉海嶠備寮案陽鳥方  
赫曦驛騎促徂邁去矣君弗留懷哉我奚賴

次韻楊司業

春夏華榮變衰歇積飈刮肌山露骨騷人望秋悲次寥  
忽見小春梅蘂發頓然喜氣排寒冬不管天令嚴缺鉞  
古來蹈道如蹈水與汨與齊偕出沒坐中白晝對羲皇  
門外黃埃自城闕只憐郭璞註蟲魚或誤蔡謨啖蜚蠊  
爭似冥冥雲翼遠靜看滑滑霜蹄蹶公桑十畝通洙泗



我菊一區連楚越，懸知真樂在曲肱。到處扁舟堪散髮，  
我能振袂從公遊。分我南溪半風月。

雪谷早行為張允中作

路絕人蹤失闕隘，槎枒老樹森矛介。兩間寥廓淨無塵，  
誰剪天花徧飛灑。風絮當頭零亂舞，茲遊浪說平生快。  
寒驚瘦骨真耐寒，踏破鴻蒙新色界。豈是提兵李常侍，  
夜發文城薄淮蔡。又非直諫韓侍郎，遠謫潮陽出秦塞。  
面黎凍帖髭綴銀，何事催君早行邁。君不見古昔閉門

僵卧人高似灞橋驢背償詩債

湖口阻風登江磯山觀濤

狂風吹人渾欲倒瑟瑟寒聲動秋草捫蘿徑上磯頭山  
萬頃江湖波浩渺怒鱗雲鬣奔騰來眩目快心千樣好  
向曾觀海難為觀回首匡廬青未了玄雲作帽深蒙頭  
五老藏昂元不老何時月夜水鏡淨淅湯澄虛納蒼昊  
着我峰尖伴老人坐看海東紅日杲

題羅漢過海圖

阿誰解衣盤礴羸作此中乘第一果等閒地獄駭屠沽  
如許風波無不可巨浸彌天靈怪百現前幻境元非我  
騰蹈逍遙容易去只有虛空無障裹般若岍金剛山超  
登只在霎時間為吾說與諸尊者更有海門關外關

張道人開華蓋山路

我家紫玄洞天前洞天仰與天相連羊腸詰曲石聲確  
每欲飛上愁攀緣道人可是堅願力開闢大道何坦然  
一躋從此出世外着我直透崑崙巔浮丘握手莞爾笑

與子別去何千年

過枯河

高堂出郭二舍近午憇東陽安樂鎮雙堤對峙似城墻  
中坳一道如壕圳驅車下坂為溝塍低平盡處還復登  
半坳一門字斗大濱滄行鹽兩分界不知此是古黃河  
且行且顧心疑怪前詢父老為余言河北山東此處分  
古河來自白馬渡東過開州城下去遂入浮光粵魯河  
入海當年猶此處

題四皓圖

皓首出山谷從容定儲宮  
儲皇已御極論賞將誰同  
飄然拂衣去詎敢貪天功  
飽茹石上芝坐蔭巖下松  
商顏鬱嵯峨千載餘清風

送唐教導往見鄉先達

謂余將有適暫此輟絃歌  
城市囂塵遠山林遺逸多  
樹膏蘇隰稻涼意到庭柯  
為問躬耕者憂饑思若何

送隣人元德之武昌

讀律已三世能詩新有聲忽辭親舍去遠作武昌行江  
漢秋風起孫曹故月明舊遊曾感慨送子倍關情

豫章貢院即事奉和雲林提舉晚春閒居舊韻  
客裏秋光好歸心不厭遲牆低孤塔見院靜一簾垂隔  
紙聞風怒臨階看日移宛然似三逕未負菊花期

與張仲美別仍用前韻

鄉隣應怪我何事獨歸遲木末芙蓉發簾前果羸垂夜  
寒知露重秋老驗星移南浦今番別重來倘可期

其二

已了公家事歸尋小洞天友吟留別句官辦送歸船夜  
月各千里秋風又一年但當頻寄字惻惻問安眠

再和林提舉韻

晝日閒庭步秋雲萬里天眼前俱實際身外一隨緣得  
意渾忘老論交豈問年此中真樂在不要華山眠

為舒景春賦東臯

東臯種杏者今住杏花村收穀虎衛道銜珠蛇報恩窗

紅開曉沴草碧驗春溫豈待閒舒嘯柏湖真有孫

贈裴子晉

怪子拋家去歸來非故吾閱人如水鏡知己慎江湖宿  
雨添新漲春風滿舊廬匆匆又言別聊為賦驪駒

題米元暉山水

一水兩山間水如練帶山如闌昔見江山似圖畫今觀  
圖畫如江山米家下筆亦等閒廬家珍襲同瑤環一朝  
身後落人手又為好者開歡顏



壽王講師

欲雪未雪雲黯黑不知此日神仙謫桃實今經幾度紅  
梅花仍似當年白厭向閩山食荔枝喜來江浦訪鸞簫  
廣文客舍寒如許自有春風長藥苗

用贈李粲然韻述懷

故里香杭涓欲流歸田計晚愧遲留懸知海上三山客  
塵視人間萬戶侯南去日尋吳市卒北來歡共李仙舟  
玄翁一室渾無白誰識王龍其鮑優

貢院中和張仲美

牆外浮屠壓古城案頭文字浩縱橫不辭霜鬢年華老  
又辦天朝歲貢英秋隴故園迷蝶夢曉窗客枕厭雞聲  
何當孺子亭前去省想高風浣俗情

九日登樓

黃葉黃花競獻新德星來聚此相親雲烟暮色樓頭眼  
風雨秋聲客裏人詩興悠悠千載事酒盃盞盞一時春  
其期白首各自愛莫負乾坤七尺身

贈金精丁葬師

古哲安墳遺舊蹤  
後人得術紹真宗  
毒眸遠賽天邊鵲  
健足生擎地上龍  
何處無神司采擇  
誰家有福定遭逢  
結廬亦欲娛吾老  
試為雲間覓一峰

送空山雷講師門人丹陵胡道士遊京師

遠遊誰為賦新篇  
來自丹陵小洞天  
拂日一鞭聊復爾  
御風雙袂已飄然  
快看鵬海三千里  
早證龍沙八百仙  
莫戀射熊春夢樂  
贈詩人在斗牛邊

次韻胡器之問病

鶯聲曉曉燕差池春到閒中日更遲  
偶躡清都陪淨侶誰知勝境即良醫  
屋頭月上元無夜樹杪風來似有期  
坐客屢談渾忘答問余還職在何時

次韻王學士七夕新秋

煌煌桴鼓引雙旌道是天孫大禮成  
金鏡南飛光欲半銀潢西去寂無聲  
佳期一夕人誰見別思千年恨未平  
最怪河東五星麗應嫌抱拙要中更

次韻息窩道人遠寄

飲罷金盤玉露杯和陽消息到寒梅  
月華夜照崑崙頂雪浪春融灩澦堆  
此事一行嗟便廢迷途未遠幸歸來  
高齋日久高人跡砌面重重封綠苔

次韻息窩道人

三年隻影落天涯望極南雲眼欲花  
道上已驚仙枕夢河邊誤泛客星槎  
棗梨秋熟供新飯桃李春榮滿舊家  
喜得息窩消息好黃金粲粲待披沙

客中即事次韻元復初郊行

急雨連宵井也渾城居寥落似山村停披儘看書堆案  
絕飲空餘酒滿樽日有虛皇相伴侶時逢嘉客細評論  
青燈一室長如晝未覺門前四野昏

客中又過二分春聞道千紅百紫新雨到庭隅長芳草  
日窺窗隙弄游塵懸知萬里只如此孤坐一堂還可人  
不信却須凌倒景九天樓閣倚長身

用魯山段錄事和李僉士丁麻姑韻時段奉憲

檄賑濟

吁軋藍輿從事衫泥途滑滑石巉巖急援野芋填溝壑  
敢避行難似隴函春氣頓回萎草木長林驚見古松杉  
一夫弗獲真吾愧誰道魯山非傅巖

立春日寓北方賦雪詩

臘轉洪鈞歲已殘東風剪水下天壇臘添吳楚千江水  
壓倒秦淮萬里山風竹婆娑銀鳳舞雲松偃蹇玉龍寒  
不知天上誰橫笛吹落瓊花滿世間

夜坐

物情堪適更誰禁  
草際螢飛鳥宿林  
魯叟邇來無夢寐  
蜀莊今去只冥沈  
客中又見秋風起  
夜半初聞木葉吟  
涼意逼人眠不得  
坐看孤月到天心

送幾泉石上人南歸

春風吹醒泉石夢  
一錫飛來到日邊  
世界空花俱幻爾  
家山老木故依然  
飄飄去住雲歸岫  
處處圓明月在天  
亦欲從師了耕種  
縣南村外有良田



九臯亭

亭臯界分與天寬小小園林望轉安門外圖書聊作府  
庭前花卉靜宜欄清懷不遣塵埃到好句留將久遠看  
放鶴從教雲裏去也應回顧此江干

詠疊葉梅

羅浮夢斷杳無蹤冰雪仙姿兩兩逢綸袂怯單寒後襲  
粉粧嫌薄曉來濃迎風一笑知顏厚隔水相看見影重  
道眼只將平等視玉環飛燕總芙蓉

道山作

同環湖水帶溪灣彷彿瀛洲海島間地上雲烟接天界  
壺中日月照人寰百年竹木青春在一院香風白晝閒  
只怕名韁牽引出雙成悵望幾時還

題閣皂山

漢吳仙跡兩峰齊欲拾瑤華路恐迷寶殿青紅疑地湧  
林巒蒼翠接天低九重香案分雲篆八景琅函記玉題  
仙鶴翔空清似水步虛聲在朶雲西

寄題無波亭

長江遠壑幾颺迴雪屋銀山巨艦摧最喜此中澄一鏡  
微風不動月常來

建康西江避暑用滕王霄韻贈章如山

石頭城下看青山羨殺浮雲終日閒寄語醉中彭澤令  
如何飛倦始知還

題山水手卷

家在江南山水村黃塵陌上兩眸昏偶然此景夢中見

歸路迢迢欲斷魂

題桃源春曉圖

朦朧曉色破初春  
一洞桃花樹樹新  
此景世間真箇有  
只今云作捕魚人

奉題樵雲吟藁以畀其子

讀盡樵雲野叟詩  
樵歌猶似入雲時  
歌聲未共樵柯爛  
底處樵家有此兒

題溪南烟雨圖

小小溪南五畝宮等閒袖手睇遙空  
春風楊柳梧桐月  
絕似垂竿烟雨巾

和逯公謹

蕭然非俗亦非僧尚被紅塵浣姓名  
辜負東籬今歲菊  
客窗晨樹聽雞鳴

方壺圖并序

蒼厓周氏為其徒羅季安畫方壺圖且畀故  
相信公遺墨二紙連作一軸臨川吳某賦詩

曰

信是蒼厓畫作仙等閒幻出小羅天  
太師鐵畫家藏舊  
雲黯烟昏四十年

又

忠臣死去去成仙住在方壺大洞天  
此境移來落塵世  
也留遺跡伴千年

贈碧溪相

溪水無心管是非臨溪照影笑山雞  
滿身文彩翻成誤

虛影何堪炫碧溪

彭澤遇成之之京都

有序

余有集賢之命與脩撰虞伯生俱乘驛而北于  
彭澤解后曹成之訓導將觀上國為賦此

人世茫茫名利場青年快意一觀光顧余白髮歸來晚  
羞過淵明五柳庄

附楊載詩

東山詩為葉子實賦

東山高幾許上有浮空雲葉君居其間好道夙所聞窮  
年絕人事矻坐攷遺文松闌晝常掩石田朝自耘葆真  
去汨昏養息襲氤氲軒冕有遺榮高舉謝世紛悠悠阻  
林莽長與麋鹿羣由來巢許臣不事堯舜君

偶題

叢生園中草蔚蔚媚幽姿乘時各敷榮皓色被綠枝似  
有微香發秋風輒吹之入人襟袖中亦復可憐茲詰朝  
步荒畦莖葉稍離披飄零即已矣霜露不爾私榮悴既



有時小大何異而幸愛七尺軀天道信難欺

夏夜偕田郎中宿子元家田君有詩因韻

長日氣甚昏欲睡不可忍薄暮更飲酒趣取太白引坐  
久輒醒然累語加况矧高情逸世表遂使名迹泯彼人  
較是非達者但微哂交遊半天下公輩獨英敏

贈執中亢上人

南山多白雲澶漫寒巖谷中有龐良叟寂寞卧林屋前  
門種高松後戶植幽竹孤風相纏繞波濤驚蕩沃梵文

五千卷誦說盡精熟時時發清唱鏗鏘擊金玉伊余走  
海內一見輒歎服願言從之遊淡泊心自足

靈龜篇為陳渭叟作

蒼龜生山中深阻絕中道不飲亦不食靈和內自抱姬  
休凝神液岩上產芝草支干集五采相射顏色好彼遊  
江海上作計苦不早一罹豫且罔性命莫能保歸遺宋  
元君天意資探討築宮脩祠祭相承以為寶神者固如  
斯遺骨易枯槁古聞蒙莊氏苦語欲相曉持為衛生經

千載長不老

次韻虞彥高遊陽明洞

憶昔神禹奠九州茲山會計功始休諸侯玉帛渺何許  
但見萬水從東流衣冠永閉陽明洞夜聞鬼哭巖之幽  
珠宮貝闕號龍瑞天造地設非人謀槎枒怪樹凍不死  
化作千丈蒼玉虬丹洞呀然仙掌裂翠峰巧矣蛾眉脩  
梅梁飛去鐵鎖斷往往雷雨生靈湫軒轅緱神極秘怪  
海上笙鶴時相投平生閉門讀史記子乃探穴先吾遊

明當挾子騎汗漫題詩更在最上頭

次韻題慈照寺浪紋石

山前流水響急灘崖崿齟齬險且艱直上正平梢赤水  
波陲漫漫龍背起幽阻之間有奇石洶若北風吹海立  
滄海飛塵事有徵遂使喧飀化冥寂開闢六萬四千歲  
浩浩洋洋不休息雖有好事者為之不似大造無痕迹  
我行見之頗愕然袖觴戲欲取涓滴僧堂托宿語不眠  
竟暮禮取生公禪意外奇崛當眼前跋涉無負兩足趼

君家住時宅通廊何如金堂友羣仙會見石髓流為泉  
何事更種東臯田子能食之可長年

題華岳江城圖

華岳能詩世有名學畫丹青亦豪放此圖以寫安慶城  
雉堞樓臺儼相向北風將至江面黑千艘萬艘爭避匿  
滄溟涌溢水倒流南嶽動搖天柱側蛟龍戲落秋潭底  
素練平鋪八千里時清好作釣魚翁閒弄輕舟烟霧裏  
神馬歌次韻陳元之

神馬來日崑崙西有足未始行沙泥朝趨欲出飛鳥上  
夕逝直與奔星齊綠鬃半散插雙耳赤汗交流攢四蹄  
風神秀猛陞天地豈顧燕蔡并渠黎時時牽浴臨清溪  
對人誇殺黃須奚玉沙之禾中芻秣不嚙堤頭枯草梯  
與君側耳聽長嘶凡馬不聞生駉駉

題秋雨長吟圖

雨暗秋天黑如墨窮居茅屋無擔石終日長吟復短吟  
吟罷令人轉悽惻饑猿抱樹屈雙肘病鶴拖泥垂兩翼

何當策杖過溪頭要看南山新翠色

錢塘懷古

山迴禁籞入雲長無復陳兵衛兩廂  
千古金鐘埋野草萬年珠樹落秋霜  
龍文不徙陽人聚鳥篆終降輶道旁  
九市塵埃來衮衮一江波浪正茫茫

其二

化人宮闕被層阿棟宇高低若湧波  
翠石文章書日月寶珠光燄燭山河  
空桑說法黃龍聽貝葉翻經白馬馱

誰謂一無超衆有只今塵土重來過

寄劉師魯

想君遊宦處正直洞庭湖落日波濤壯晴天島嶼孤舟  
航通漢沔風物覽衡巫天下文章敵非君孰起余

奉題伯父雙峰樵隱

山出雙峰秀溪流一派清土風存禮讓人事省將迎路  
逐高低過田隨早晚耕家林有如此南望每關情

其二



童稚離桑梓猶能憶故山雲峰垂白脚蘚石露蒼顏插  
架詩書富應門禮義閑綠林遺我恨回首淚攔珊

其三

草滿三春綠山留萬古青呼兒欣解意應俗憚勞形採  
菌敲寒木收魚照夜汀祇應老崖谷束帶尚論經

竹樹圖

荆棘蒙籠迷竹樹亂堆古石蒼苔護縱橫獵青郊懷舊路  
躍馬重岡追狡兔箭翎落地無尋處

石倉歷代詩選卷二百三十九

欽定四庫全書

石倉歷代詩選卷二百四十

明 曹學佺 編

元詩十

薩都拉

早發黃河即事

晨牽大河上曙色滿船頭依依樹林出慘慘煙霧收村  
墟雜雞犬門巷出羊牛炊煙動茅屋秋稻上墉丘嘗新

未及試官租急徵求兩河水平堤夜有盜賊憂長安里  
中兒生長不識愁朝馳五花驄暮脫千金裘鬪雞五坊  
市酣歌最高樓繡被夜中酒玉人坐更籌豈知農家子  
力穡望有秋短褐長不完糲食長不周醜婦有子女鳴  
機事耕疇上以充國賦下以祀松楸去年築河防驅夫  
如驅囚人家廢耕織嗷嗷齊東州飢餓半欲死驅之長  
河流河源天上來趨下性所由古人善隄備鄙夫無良  
謀我歌兩岍曲庶達公與侯淒風振枯槁短髮涼颼颼

度閩關

曉度分水嶺身在雲霧中手如天上捫聲落山下風雷  
霆走澗壑神人過虛空傾刻開萬象赤烏飛嶺東白雲  
下千峯盡入懷袖裏振衣度閩關灑作山下水仰登天  
有梯俯視井無底古來守關人盡作山下鬼寒食百草  
青春風吹不起

溪行兩岼皆芙蓉桂花余喜遂賦此詩

芙蓉發蓓蕾桂樹花爛斑中秋前日過客子未出關香

生桂樹叢岼下芙蓉葉花以寄遠人葉以作書帖何日  
棹船還桂樹芙蓉間船頭聽我夜吹笛吹起月輪昇東  
山

宿烏石驛

雲起烏石峯雨灑紫溪嶺孤館如山深愁人覺宵永燈  
花剪復開風竹亂不整清晨度闕關南斗落水領好作  
度關詩點筆題石筍

石上晚酌天章臺

晚涼上烏石置酒天章臺日夕下山去海風吹月來豪  
氣吐千丈朗吟動三台白露瀉仙掌銀河瀉金杯誰識  
芙蓉仙飛身在蓬萊

題汀州丁三溪知事卷

三溪會汀州上有仙人居乃是丁令威玉珮搖瓊琚高  
秋下風露水清暎芙蓉華表慣聞鶴小船閒釣魚鑑湖  
風半曲賀老竟何如

夜興

千峰走晴雷風力吹邊雨層雲不成陰殘霞如敗堵山  
深日易暝孤館問誰主燈花翳復明落葉聲可數獨立  
眇相親厨人夜深語

題焦山方丈壁

江風入霜林寒葉下疎雨蕭蕭復蕭蕭可聽不可數山  
僧亦好奇呼童掃行路到處覺秋聲肩輿入山去

送吳寅甫之揚州

青楊吹白花銀魚跳碧藻落日上海船二月淮南道渺



渺春水涯悠悠雲樹杪安得快并刀江頭剪芳草

秋日病起池上

顧茲林塘幽消此閒日永飄風辭萍踪落葉散魚影天  
池風露涼秋深藕花冷有懷無與言獨立心自省

寄朱舜咨王伯循

木落淮南秋蘭橈泊汀渚把酒三人同江亭看飛雨雨  
過江色浮妙景發天趨歷歷江南山一一青可數

其二

微茫揚子橋細雨濕秋色小艇載吳姬搖搖語相接風  
起布帆高一往不可得夜宿廣陵城吹簫照明月

其三

霜高木葉空江清水花淨離懷江水深楚女晚粧靚按  
指聽歌聲點筇行酒令白露滿衣裳迴野垂斗柄

宿臺山寺絕頂

江白潮已來山黑月未出樹梢一燈明雲房人獨宿近  
水星動搖河漢下垂屋四月夜深寒繁露在脩竹

望鼓山

鼓山起千仞迺是東海垠蛟龍穴其下霹靂翻海門高  
深雲濤湧日夜雪浪奔何當臨絕頂俯視浴日盆

題茶陽驛飛亭

白雲飛出山怒擘蒼崖裂幽林濕晴雲絕壁灑飛雪萬  
折入滄海龍宮水晶闕簸蕩弄珠人冰簾掛寒月

將至大橫驛舍舟乘輿暮行

山行日已暮肩輿度林薄涼飈淒以清松子當面落千

山月崔巍萬葉雨蕭索昨夜棹歌行頗憶溪上樂

聞秋蛩有懷

秋蛩集草樹淒然一何繁行子在遠道豈不思故園禾  
稻上丘壠鳥雀知欣喧田園可終老軒冕寧足言

白雲塔

使君抑何忙寧不思故山茫茫天壤間鳥倦猶知還石  
田紫芝老茶竈碧蘚斑胡不賦歸來分子屋半間

望武夷

溪行望武夷峭壁何巖絕赤霞亂不收大化元氣泄下  
有萬年松上有太古雪祇恐月明中鐵笛吹巖裂

宿武夷

艤舟山水間漢祀有宮觀月挂水晶簾風吹紫霞幔雞  
犬過雲間笙樂度天半傳語武夷君酒熟幸相喚

吳橋縣古河堤

迢迢古河堤隱隱若城勢古來黃河流而今作耕地都  
邑變通津滄海化為塵堤長燕麥秀不見行河人

偶題清涼境界

今日清涼境明朝劒水心  
酒堪消客況泉可洗塵襟  
佛古荒苔蘚林深繁綠陰  
樵歌山路晚餘興付歸禽

送石民瞻吳江訪友

老友之江去吳江興味高  
一樽散鱸膾四月過櫻桃  
雙鑠綠玉杖風流白紵袍  
西窗故人夜應是動揮毫

鍾山晚行

樓閣龍雲氣蒼茫第幾峰  
長風萬松雨落月半山鐘  
石

磴盤空險僧廊落葉重  
吾皇曾駐蹕千古說蟠龍

寄舍弟天與

鴻雁飛南北關河隔弟兄  
水通鄖子國舟泊漢陽城  
落木風霜下高秋鼓角清  
故人如有意為我道鄉情

送景南上人歸江西

登高傷遠別鴻雁幾行飛  
萬水江頭落一僧船上歸  
故山秋嶂遠殘日晚鐘微  
亦有同袍者多應候竹扉

偕趙逢吉避暑石頭城  
日暮余歸逢吉留宿山

中次日寄逢吉并長老珪白巖

竹下一僧坐城頭獨客還星河下平地風露滿空山犬吠松林外燈明石壁間故人借禪榻心共白雲閒

秋日雨中登石城訪長老珪白巖不遇

石頭城上去紅葉雨紛紛半日不見路四山都是雲魚龍隨水上鐘磬隔江聞遙憶南庄叟天寒補衲裙

寄御史王伯循

曠達王夫子才高早避名昨離建業水今住廣陵城有



酒從人飲無田藉筆耕竹西燈火夜誰識繡水行

錄囚河間還司送憲使韓仲宣調山東

尚想分司日人生類轉蓬同行三伏盡此別幾時逢雪  
竇泉花白霜林柿葉紅山東好風景少駐莫匆匆

立秋日登烏石山和揚子承

海國山四圍繁華坐消歇樓觀沈夕陽鴻雁下秋色水  
邊無麗人石上多古刻感此暮歸遲秋露滿山白

過采石驛

客路青山外鄉心落照邊輕嵐浮野樹涼雨過淮天水  
調誰家笛江帆何處船蛾眉臺上月今夜照孤眠

寄王御史

御史傳天語飛霜到海垠浙江潮似雪閩土臘如春孤  
客見明月亂山愁美人何時動歸興家有白頭親

送管元帥南征

楚帆風一葉此去幾時還日暮漢江碧雨晴湘竹斑邊  
聲連草木野色動荆蠻決策平徭後歸心北固山

鍾山遇風雨

城市多驄馬清遊有幾人  
山靈飛白雨朝士說紅塵  
雲起鐘樓暝桃開野寺春  
上人歸太晚法席為誰賓

元統乙亥余銖囚至滄州坐清風樓

晉代繁華地如今有此樓  
暮雲連海溆明月滿滄洲  
歸鳥如雲過飛星拂瓦流  
城南秋水盡寂寞採蓮舟

宿大橫驛

燈火明沙渡牛羊過水西  
村春千澗落野店四山齊  
桂

樹偏宜月人家盡向溪秋蟾莫相惱惟聽度關雞

遊梅仙山和唐人韻

城郭千峰合仙凡一水分顛崖懸鳥道亂石聚羊羣苔  
井分丹水茶爐煮白雲肩輿萬松嶺有客訪梅君

絕頂尋仙跡寒泉照病容栖鸞多種竹愛鶴緩移松丹  
藥人來乞山粳手自舂秋深霜葉滿麋鹿日相逢

仙人不可見借鶴過仙家夜臥千峰月朝飧五色霞祠  
空風掃葉人去鹿銜花歸隱知何日分爐學煉砂

平川幽居

深隱雲林靜何須負郭田圖書從塞屋雞犬亦登僊  
釀酒尋仙術脩琴借藥錢閒過武夷洞來上釣魚船

次王御史韻

江城連日雪騎馬欲何之老樹昏鴉集寒塘落雁遲  
松窗燈下酒竹屋夜深碁寄語王公子幽棲或可期

焦桐

憐爾抱奇質無香已自焚材高初偶得音古更誰聞  
天

海空遺操冰霜見裂紋中官方煮鶴終得舍夫君

塵鏡

古鏡色如墨千年獨此留玉臺蟲網暗珠匣土花浮  
莫笑塵埃滿曾令鬼魅愁蟠龍今已化雲雨夢悠悠

廢檠

不解照珠翠早同文字盟何年中路棄無復向人明  
雨宿高齋夢秋吟廢館情相看幾今夕及此慨平生

斷碑

零落秋風卧何年破廟碑圖經愁莫載耆舊說頻移野  
燒龜文失荒臺鳥迹疑遙知千載後拂拭轉堪悲

卧鐘

龍簾久摧折深埋柰爾何耕民誰睥睨野衲自摩娑雅  
奏多年歇銘文幾字訛斜陽荆棘裏長伴舊銅駝

送人兄弟相別

送兄南浦上情思兩悠悠昆弟難為別江山總是愁櫓  
聲搖夜月帆影障寒流後夜相思處嗷嗷鴻雁秋

道中漫興二首

雲氣千峰暝溪流水拍橋竹蹊泥滑滑榕樹雨瀟瀟曲  
棧鉤崖角垂虹挂嶺腰山家酒初熟或事借柳瓢  
綠樹鶯啼盡山紅映碧蘿一年春事了四月雨聲多閩  
海夏無暑山田晚種禾遠人千里別歸思欲如何

鸚鵡曲題楊妃繡枕

水晶簾垂官畫長六曲屏風圍繡牀美人春睡苦不足  
夢隨飛燕遊昭陽覺來粉汗濕香臉一線新紅枕痕淺



三十六宮在眼前五色香雲隨指轉牙狀端坐楊太真  
雲冠霞珮絳色裙雙成小玉畫宮樣繡衣烏帽高將軍  
雕籠七寶掛官樹玉案銀盤看鸚鵡可憐鸚鵡解人語  
不說漁陽動鼙鼓迺知禽語能戲人不知人語能殺身  
亡家敗國汙天地天生尤物亦可嗔一朝艷質化塵土  
堪恨堪憐千萬古香魂不逐馬塵飛猶記深閨繡房女  
重簾紫霧垂洞房錦屏繡褥蘭麝香夜深酒醒換銀燭  
時見楊妃在耳傍君不見轆轤未轉隋宮井博山香爐

煙爐冷繁華一夢人不知萬事邯鄲呂公枕

華清曲題楊妃病齒

沈香亭北春晝長海棠睡起扶殘妝清歌妙舞一時靜  
燕語鶯啼空斷腸朱唇半啓榴房破胭脂紅注珍珠顆一  
點春酸入瓢犀雪色鮫綃濕香唾九華帳裏薰蘭烟玉  
肱曲枕珊瑚偏紫釵半脫翠蛾歛龍髯天子空垂涎妾  
身雖侍君王側別有閒情向誰說斷腸塞上錦綳兒萬  
恨千愁言不得城都遙望新荔枝金盤朱實甘如飴紅

塵一騎不成笑病中風味心自知君不聞華清宮一齒  
作楚藏禍根又不聞馬嵬坡滿身溅血未足多漁陽他  
日鼙鼓動始覺開元天下痛雲臺不見漢功臣三十六  
牙何足用

過居庸關

居庸關山蒼蒼關南暑多關北涼天門曉開虎豹臥石  
鼓晝擊雲雷張關門鑄鐵半空倚古來幾度壯士死草  
根白骨棄不收冷雨陰風泣山鬼道傍老翁八十餘短

衣白髮扶犁鋤路人立馬問前事猶能歷歷言丘墟夜  
來鋤豆得戈鐵雨蝕風吹失顏色鐵腥惟帶土花青猶  
是將軍戰時血前年人復鐵作門貌貅萬竈如雲屯生  
存有功掛玉印死者誰復招孤魂居庸關何崢嶸上天  
胡不呼六丁驅之海外休甲兵男耕女織天下平千古  
萬古無戰爭

寒夜聞角

野人卧病不得眠嗚嗚畫角聲淒然黃雲隔斷塞北月

白雁叫破江南煙山城地冷迫歲暮野梅雪落溪風顛  
長門美人怨春老新豐還惜少年好夜深悲壯聲搖天  
萬瓦月白霜華鮮野人一夜夢入塞走馬手提鐵節鞭  
髑髏飲酒雪一丈壯士起舞羶帳前五更夢醒氣如虎  
將軍何人知在邊

過桐君山

桐山峩峩桐水清仙人不住芙蓉城山頭笑指梧桐青  
至今山水俱得名丹光夜照江水赤赤浪神魚夜飛出

碧桃花下覓神仙  
白日山中遇樵牧  
江深谷響山有靈  
東山人喚西山應  
漁人誤入水簾洞  
石崖倒挂丹崖藤  
祠荒路斷行人少  
石上清風長瑤草  
月明黃鶴飛渡江  
仙人一去梧桐老

夜泊釣臺

雙崖屹立幾千仞  
下有一葉之孤舟  
繁星亂垂光煜煜  
長藤古木風颼颼  
荒祠幽黑山鬼集  
怪石如人水邊立  
錦峰繡嶺雲氣深  
萬壑千巖露華滴  
山僧對語夜未央

不知風露滿衣裳喚船振錫渡江去林暝無由歸上方  
高寒宇宙無人語亂石灘聲灑飛雨欲從嚴子借羊裘  
坐待船頭山月吐

題壽監司所藏美人織錦圖

卷中織錦秦川女大姬啞啞弄機杼小姬織倦何所思  
簾幕無人燕雙語成都花發江水春門前馬嘶車轢轢  
髻雲垂珥看欲墮蛾眉八字畫不伸行人一去無消息  
冰蠶吐絲未成色柔腸九曲細于絲萬縷春愁政如織

綺窗睡起聞早鶯西樓月落金盆傾暖霞拂地海棠曉  
香雪潑戶梨花晴日長春院機聲動梭影穿花飛小鳳  
水心驚起鴛鴦棲花底不成蝴蝶夢纖纖玉指柔且和  
香鉤小機裁春羅滿懷心事付流水蕩目雲錦迴青波

梅仙山行

赤星落色漢祚微端門日日腥風吹咸陽秋色壓官樹  
金人夜泣銅駝悲先生袖疏探虎窟漢鼎猶堪支一足  
九重煙霧似海深門外何人知慟哭賊莽白日升高臺



玉璽墮地聲如雷周公揖讓孺子戲絳袍將軍何日來  
塵飛滄海風擲瓦去國身輕快如馬一聲鐵笛度閩關  
山月溪風共瀟灑龍爭虎鬪耳不聞長嘯袖拂松枝雲  
夜鐺白石煮秋雨玉佩赤錦飄霞裾先生一去幾千載  
尚有當年遺跡在藥爐寂寞秋草深丹井水落莓苔侵  
悵望林巒顏色好翩翩白鶴重過臨

補闕歌

錢塘風雨三日急古銅夜光飛霹靂是知神物出人間

猶帶吳宮土花碧玉橋素練懸銀河支機女兒飛鳳梭  
蝦鬚風軟亂纖影春水日晴生潮波破窗冷硯留不得  
零落江南酒家客狂歌索酒仰面歌誤擊紅籌唾壺裂  
何人進入蓬萊宮銀屏碧幙珠簾重此生補闕亦何用  
玉龍瀉水流芙蓉

西樓別寄閩憲諸公

八月八日溪上別溪上採旗紅獵獵離情已逐渡江雲  
邊草連天剪秋色玉驄金虎諸大夫欲別不別留斯須

沙明淺渚白鳥下酒盡落日青山孤  
大夫有淚不須灑  
去客挂帆君上馬悠悠回首各東西  
惟見西溪捕魚者  
閩關一片月太行一片雲  
雁書遠寄隔山嶽雲飛月明  
多憶君

送友人之金陵

陳郎買舟上金陵  
寒江水落風浪小  
飛帆遠挂蔣山青  
空城畫角秦淮曉  
白門酒美共濃城  
吳姬喚客客不行  
樓中子弟盡少年  
玉奴行酒吹鸞笙  
陳郎不聽黃金縷

朝走東吳暮走楚，半生落魄一故袍。  
感慨長歌弔千古，六朝遺跡生暮煙。  
故家荒塚迷花鈿，鳳凰臺上醉李白。  
何人知子囊無錢。

題江鄉秋晚圖

沙頭潮下秋水枯，雲山落日雲模糊。  
草堂遠近路長驅，蕭蕭行李行人孤。  
寒驢渡橋歸思急，村南村北天秋色。  
何者相呼雞犬聲，山前山後煙樹立。  
江風水面吹殘莎，打魚小艇如飛梭。  
何人盪槳立船尾，釣叟船頭腰半駝。

小李將軍不可作粉壁流傳愁剝落石門守者猶好奇  
拄杖敲門索新跋京口綠髮參軍郎見君此畫心即降  
攜家便欲上船去買魚煮酒揚子江

南臺月

江南江上逢中秋城南石梁初截流長虹一道貫秋色  
中分百里江南州殘露消盡魚尾黑金蛇翻動三江白  
金輪漾出碧玻璃照見釣龍臺上客臺中之客懷古心  
黃河太華三登臨今年携月醉臺畔越山越水為月吟

無諸城裏人如海無諸故塚埋殘靄釣龍臺上草離離  
龍去臺空三十載昔龍已去江悠悠今龍雖在人未求  
懷珠豈立此臺下要上黃金臺上鉤乾坤四顧渺空濶  
詩書元氣行勃勃合沙古讖此其時天下英雄求一決  
南臺月照男兒面豈照男兒心與肝燕山買駿金萬斛  
萬里西風一劒寒

征婦怨

有柳切勿栽長亭有女切勿歸征人長亭楊柳自春色

歲歲年年送行客一朝羽檄風吹煙征人遠戍居寒邊  
鱗鱗車馬去如箭錦衾繡枕難留戀黃昏寂寞守長門  
花落無心理針線新愁暗恨人不知欲語不語顰雙眉  
妾身非無淚有淚空自垂雲山煙水隔吳越望君不見  
心愁絕夢魂暗逐蝴蝶飛覺來羞對窗前月窗前景色  
照人寒遲遲鐘鼓夜未闌燈闌有恨花不結粧臺塵慘  
淚斑斑半生偶得一錦字道是前年戰時苦一朝血杵  
煙藪除腰間斜掛三珠虎妾心自喜還自驚門前忽聞

凱歌聲錦衣繡服歸故里不記昔日別離情別離之情  
幾青草鏡裏容顏為君老黃金白壁買嬌娥洞房只道  
新人好

題畫馬圖

漢水揚波洗龍骨房星墮地天馬出四蹄蹀躞若流星  
兩耳尖脩如削竹天閑十二連青雲生長出入黃金門  
鼓鬃振尾恣偃仰食粟何以酬主恩豈堪碌碌同凡馬  
長鳴噴沫奚官怕入為君王駕鼓車出與將軍靜邊野



要令四海無戰爭千古萬古歌太平

楊花曲

燕京女兒十六七顏如花紅眼如漆蘭香滿路馬蹄飛  
窄袖籠鞭嬌欲滴春風淡蕩搖春心金箏銀燭高堂深  
繡裳不暖錦鴛夢紫煙紅霧天沈沈芳年誰惜去如水  
春困着人倦梳洗夜來小雨濕天街滿院楊花飛不起

海棠曲

內家楚楚諸王孫白馬金鞍耀日暄樽前細樂耳厭聞

世上閒愁如緒，禁宮錦裁成五色雲。真珠厖就雙龍紋，衣裳光彩照暮春。紅靴着地輕無塵，翠樓珠箔玉鈎掛。腸斷纖腰舞一把，海棠花底畫聞鶯。太液池邊春洗馬，千枝萬枝桃杏紅。花枝飄香薰酒中，歸來月落酒未醒。有詔早入明光宮。

蘭皋曲

溪水潤蘭長幽芳，春溪露滴蘭葉光。美人日暮採蘭去，風吹露濕芙蓉裳。芙蓉為裳蘭結佩，玉立亭亭臨水際。

天寒袖薄人不識  
踈雨蘭苕鳴翡翠  
幽蘭日日吹古香  
美人不來溪水長

鞦韆謠

寒梅零落春雪灑  
蕭娘腰瘦無一把  
淡黃楊柳未成陰  
何日已繫青驄馬  
畫樓深處迎春歸  
鞦韆影裏紅杏肥  
濛濛花氣濕人面  
東風吹冷輕羅衣  
衣上粉珠流不歇  
暗解翠裙花下摺  
殷勤莫遣燕子知  
會向人間報風月

江南樂

江南樂春水虹橋滿城郭出門不用金馬路門前花船  
如畫閣綠紗窗虛鎖春霧隔窗蛾眉秋水活翡翠冠高  
羅袖濶楚舞吳歌勸郎酌紫竹瑤絲相間作船頭柳花  
如雪落船尾綵旗風綽綽秉燭夜遊隨意足人生無如  
江南樂

江南怨

江南怨生男遠遊生女賤十三畫得蛾眉成十五新妝  
識郎面識郎一面恩猶淺千金買官遊不轉郎家水田

跨州縣大船小船過淮甸買官未得不肯歸那惜韶華  
去如箭楊花簾幕飛乳燕疎雨梧桐閉深院人生無如  
江南怨

江南春次前韻

江南四月春已無黃酒白醅紅櫻珠吳姬小醉弄絃索  
十指春雪如凝酥池塘過雨春波漲風捲楊花落蛛網  
翠眉新婦歌春愁白馬少年歸日晚遊魚水淺出短蒲  
誰家銀箭飛金壺日長睡起翠陰午簾外忽過流鶯孤

為九江方士高賦

匡廬山中有佳士讀書結屋巢雲松碧窗夜影紫翠動  
落日照見香爐峯窺燈夜壁山鬼過采蘭朝徑仙人逢  
危簷墮雪聽風竹古寺隔嶺聞煙鐘每思幽絕動歸興  
歲晚落葉迷行踪扁舟何日過湖口分我半壁嬌芙蓉

越溪曲

越溪春水清見底石罅銀魚搖短尾船頭紫翠動清波  
俯看雲山溪水裏誰家越女木蘭橈髻雲墮耳溪風高

採蓮日暮露華重  
手滴溪水成葡萄  
盈盈隔水共誰語  
家在越溪溪上住  
蛾眉新月破黃昏  
雙櫓如飛翦波去

紫溪道中

三月晦日春欲還  
深林百鳥鳴間關  
綠雲迷合紫溪嶺  
白雲遙掛烏石山  
山高雨落不到地  
萬壑千巖灑飛翠  
遠人送春千里歸  
風送籃輿野花墮  
問關咫尺上青霄  
海上三山路不遙  
地僻題詩公事少  
芙蓉帳裏紫雲飄

雲際興感

昨日登芝峯茲晨陟雲嶺俯視城中居萬瓦落深井風  
露灑落生秋寒飛泉落澗聲潺湲筍輿軋軋度脩竹石  
闌曲曲躋層巒層巒絕頂天尺五我欲排雲擊天鼓九  
關虎豹不須驚吐膽開心見天語天鼓不可擊天門何  
日開請君聽我紫芝曲手招白雲歸去來

繡鞋

羅裙習習春風輕蓮花帖帖秋水擎雙尖不露行復顧  
猶恐人窺針線情縑雲隱暎籠新月花影依稀襯香頰



彩鳳欲翔雙顧飛鴛鴦漫語愁舟裂落紅濕透胭脂膩  
半幅凌波剪秋水莫教踏破浣溪沙濕重東風擡不起

春別

花氣壓簾愁不掃細雨粼粼長芳草玉釵燕尾剪春寒  
坐惜流年鏡中老東風吹柳人不知春嬌滿眼顰雙眉  
吳松錦字夢中得曉來月落聞烏啼南園日暖芙蓉醉  
香霧薰人海棠睡朱門小立蹴金蓮落紅起作離人淚

題二宮人琴壺圖

行雲留影雪弄香藕絲翠織芙蓉裳春風拂拂蘭蕙芳  
金殿不鎖雙鴛鴦水絃素手彈鳳凰玉壺投矢聲玎璫  
花落無人春寂寞侍女空抱琵琶泣誰知絕代有佳人  
不解傾城與傾國笙歌別院留春住嬋娟千古蛾眉妬  
却笑長門閑阿嬌黃金好買相如賦

過桐廬

桐廬山水天下清洪濤拍岸山圍城桐君已乘丹鳳去  
世間草木誰知情落日搖紅魚尾赤江上潮迴沙嘴立

三三兩兩野人家半住漁村半樵牧盡拋章甫求仙靈  
松間黃鶴喚不應阻風三日看山色平生慣識枯枝藤  
碧桃海上開多少幾度春風長瑤草白雲滿地不歸來  
石爛松枯天地老

過嘉興

三山雲海幾千里十幅蒲帆掛秋水吳中過客莫思家  
江南畫船如屋裏蘆芽短短穿碧沙船頭鯉魚吹浪花  
吳姬蕩槳入城去細雨小寒生淺莎我歌水調無人續

江上月涼吹紫竹春風一曲鷓鴣詞花落鶯啼滿城綠  
走筆贈燕孟初

別君金陵城遇君錢塘驛落魄江湖懶折腰笑傲公侯  
但長揖柳花吹香撲酒缸酒波灩灩如春江西湖天鏡  
碧墮地吳山蛾眉春入窗平生豪氣如虹吐餘子紛紛  
何足數驛亭把酒歌別離醉聽江潮鳴萬鼓

偕卞敬之遊吳山駝峰紫陽洞

天風吹我登駝峰大山小山石玲瓏頽霞日射紅瑪瑙

白露夜滴青芙蓉飄飄雲氣穿石屋石上涼風吹紫竹  
掛冠何日賦歸來掃石篝燈洞中宿

芙蓉曲東善狀元御史索賦

秋江渺渺芙蓉香秋江女兒將斷腸絳袍春淺護雲暖  
翠袖日暮迎風涼鯨魚風起江波白霜落洞庭飛木葉  
蕩舟何處採蓮花愛惜芙蓉好顏色

皂林舟中

春溪野鴨肥可射幽樹深陰叫山鷓遠人三月酒船過

柳絮飛時杏花謝行行水竹上雲林往往人家或僧舍  
小官便欲賦歸來何處買山錢可借

江上聞笛

江上何人吹玉笛水冷沙寒龍夜泣鯨人水底織冰綃  
灑淚行珠明月高銀河淡淡月茫茫雁奴打更沙渚傍  
更深繡被夜寒重明月梅花滿地霜

御史李公藝

涼風吹動梧桐葉瀉下泠泠露華白樂陵臺上悄無人

獨倚梧桐看秋月，月高當午桐陰直。不覺衣沾露華濕，此時却憶金陵人。酒醒江樓聽吹笛。

連夜雨晴

石榴花紅細雨白，江南四月天氣涼。須臾雲散忽晴色，滿院花樹生幽香。幽人抱病無可語，日出南窗看晴雨。小兒造化多娛人，世上俗子徒勞神。

次韻休上見寄

山深樹密鳴鴉肥，山人得句多清奇。深沈竹院山日靜，

焚香自禮天人師門前雨過巖花活涼風蕭蕭袖衣薄  
狂鄰卧病在江城懷抱思君空作惡

夜坐贈秀才

青原故人貧且窮燕山野客疲復聾擁爐不覺殘火白  
開窗忽見月明東乃知清景不可得得詩一笑衰顏紅  
夜深吹燭且睡去樓外落雁呼霜風

春遊太真觀

東風惱人如着酒晚鶯啼斷門前柳青山忽然契我懷



飛上玄都十星斗綠雲弄雨小立久幾片落花春在手  
遼東白鶴胡不歸松下丹鉛老霜白

京口夜坐

鐵甕城頭刻漏遲涼霜如雪撲簾飛雁聲墮地夢迴枕  
月色滿城人搗衣塞北將軍猶索戰江南遊子苦思歸  
呼鷹腰箭從圍獵苜蓿秋深馬正肥

登金山雄跨亭

朱欄六曲倚高秋元氣茫茫日夜浮客去客來天地老

潮生潮落古今愁疎鐘水國前朝寺落日海門何處舟  
更擬黃昏盡餘興却從燈火望揚州

寄賀天竺長老訴笑隱名住大龍翔集慶寺

東南隱者人不識一日才名動九重地濕厭看天竺雨  
月明來聽景陽鐘衲衣香暖留春麝石鉢雲寒臥夜龍  
何日相從倍杖履秋風江上採芙蓉

高郵城樓晚望

城上高樓城下湖城頭畫角曉鳴鳴望中燈火明還滅

天際星河澹欲無，隔水人家種楊柳。  
帶霜鳬雁起荻蒲，短衣匹馬非吾事。  
擬向煙波覓釣徒。

和中丞伯庸馬先生贈別中丞除南臺僕馳驛  
遠迓至上京中丞改除徽政以詩贈別

江南驛使路遙遙，遠赴龍門看海潮。  
桂殿且留修月斧，銀河未許度星軺。  
隔花立馬聽更漏，帶月鳴珂聽早朝。  
祇恐淮南春色動，萬竿煙雨綠相招。

寄京口鶴林寺長老即休

白頭不出城南寺枯坐蒲團笑客忙過暑葛衣從破碎  
逢秋竹院愈荒涼空山雲濕龍歸鉢古屋松低鶴到床  
遙憶題詩舊遊處夜深東壁月蒼蒼

次學士盧疎齋題贈句容唐別駕

疎齋落落謫仙才句曲名山數往來日讀茶經醫酒病  
春從鄰舍覓花栽昔年奏對含雞舌今日登臨獨鳳臺  
賴有閑居唐別駕尋詩猿鶴莫驚猜

送僉事王君實之淮東

使君臘月揚州去東閭梅開雪壓枝淮上有官皆避馬  
竹西無處不題詩春風楊柳平山路夜月瓊花后土祠  
從此公餘多勝覽好傳佳句遠人知

贈吳山紫陽菴女道士

并引

武林吳山紫陽菴澗民有丁姓者棄俗為全真  
一日忽召其妻入山書詩四句云懶散六十三  
妙用無人識順逆兩俱忘虛空鎮常寂坐抱一  
膝而逝俗謂之騎鶴化其妻束髮簪冠為女道

士奉其夫屍二十年不下山幾于得道神仙  
渺茫姑不暇論其婦一節乃可尚也婦年七  
十王其姓諱守素亦涪人云登覽之餘因為

賦詩

不見遼東丁令威舊遊城郭昔人非鏡中春去青鸞老  
華表山空白鶴歸石竹淚乾斑雨在玉簫聲斷綵雲飛  
洞門花落無人迹獨坐蒼苔補道衣

層樓

廣寒世界夜迢迢醉拍欄干酒易消河漢入樓天不雨  
江風吹月海初潮影搖翠幙金蓮炬夢斷涼雲碧玉簫  
休唱後庭舊時曲六朝宮殿草瀟瀟

贈學古澹上人

瘦影相隨九節筇同袍無處覓行蹤  
遠看天目山中寺來聽石頭城裡鐘  
洗鉢泉通陳井水開窗雲度蔣陵松  
忽聞一夜猿啼月却憶飛來最上峯

再遊崇禧寺

野人再到城南寺臨水芙蓉次第開新酒瓦盆青映竹  
前題石壁綠封苔夕陽半嶺牛羊下秋色滿天鴻雁來  
獨上新亭天地濶不須揮淚灑蓬萊

采石懷李白

夢斷金雞萬里天醉揮毫筆掃蠻箋錦袍日進酒一斗  
采石江空月滿船金馬重門天似海青山荒塚夜如年  
祇應風骨蛾眉妬不作天仙作水仙

登石頭



登臨未惜馬蹄遙古木秋高萬葉凋廢館尚傳陳後主  
新碑猶識晉南朝年深堦路埋花徑雨壞山牆出翠翹  
六代興亡在何處石頭依舊打寒潮

題舒真人仙山樓觀圖

瑤花琪樹間霓旌十二朱樓接五城臺上吹簫秦弄玉  
雲邊度曲許飛瓊燭流漢殿青鸞舞霞擁函關紫氣明  
方丈蓬萊俱咫尺不須東望問長生

次韻寄茅山張伯雨

句曲道人門不出幾時芒屨接殷勤春晴洗藥分泉去  
午睡烹茶隔竹聞山脚客行驚犬吠樹皮苔老結龍文  
三層臺上月如水半夜吹簫入紫雲

送僧還江西

病僧歲晚歸何處落日空山白雁聲洗鉢欲辭揚子渡  
談經多上豫章城雲深廬阜青松老風細鄱湖白浪生  
更點諸方圖畫看高低遠近互縱橫

卽事

枕邊漏水催更箭，城下霜風動捲蘆。  
寒夜繡簾人送酒，小樓銀燭客提壺。  
自憐今日江南夢，猶認當年柳下墟。  
準擬上元燈火夜，扁舟載酒下姑蘇。

招隱首山分韻得生字

龍飛鳳隱知何處，今日空餘黃鵠名。  
千古江山圍故國，五更風雨入空城。  
猿啼洞府暮雲合，花落祠堂春草生。  
何日結茅向青壁，抱琴支石聽泉聲。

遊竹林寺

野人一過竹林寺無數竹林生白煙江左玉龍埋碧草  
月明黃鶴下青田樹銜宿雨藏山鷓花落春風老杜鵑  
何日來分雲半榻故人寧用買山錢

次韻二首

池塘過雨水生漪倚檻觀魚自悅怡長日似添詩有趣  
故人因為病相知涼風忽過簾鉤動午箭初長刻漏移  
何處榴花照人面隔牆紅過兩三枝

江南三月踏殘芳白苧衣輕樹影涼曲巷銀燈先馬去

誰家翠袖隔簾香  
細歌金縷鳴牙板  
新酒檀槽出玉漿  
卧病日長思往事  
買舟乘興過滄浪

奉次參政繼譽王先生海南還桂林道中韻

空山幽響落林柯  
蠻犬啾啾吠碧蘿  
大庾嶺頭三月盡  
鬱孤臺下幾人過  
檳榔雨過鳩鳴急  
荔薜雲深猿嘯多  
幾度裁詩寄相憶  
江南如此奈愁何

無題

為客三年海上洲  
故鄉何處瘴雲稠  
數千里外蠻人域

十八灘頭過客舟時有山禽呼姓字或從烏鬼作朋儔  
故人珂珮周旋處紫殿風清十二樓

九華山題石潭驛

馬上行人看九華飄飄高旆倚天涯排空峭石生玄筍  
落日奇峰掛赤霞仙掌九秋擎露屑天河半夜礙星槎  
雲中五老應招手喚客來遊太一家

夢登高山得詩二首

登高遠望四山齊何處風流杜牧之白苧曾聽松下唱

紫簫還向月中吹野雲雨後無行跡芳草春深有斷碑  
夢裏勝遊間記得翠微高上寫烏絲

芒屨踏破碧崔嵬夢裏清遊樂未回萬壑泉聲松下去  
數行秋色雁邊來文章小杜人何在風雨重陽菊自開  
山路雲深行客倦竹雞飛上獨春臺

建德道中

泉作溪流石作橋桑麻成隴接東饒雞鳴犬吠人家近  
水轉峯回驛路遙虎嘯樹林風獵獵人行弓箭馬蕭蕭

多情一片吳天月夜夜相隨伴寂寥

登鳳凰臺

梧桐葉落秋風老人去臺空鳳不來梁武祗園芳草合  
吳王宮殿野桃開石頭城下春如水燕子堂前雨長苔  
莫問人間興廢事百年相遇且啣杯

和同舉觀志能還武昌

短衣匹馬走塵埃山川歷歷何雄哉漢陽城高鼓角動  
洞庭秋水鴻雁來雪消巴蜀浪翻屋黃鶴磯下聲如雷



是時立馬夜呼渡清江苦竹聞猿哀

題半山寺

今日偶成林壑趣清幽恨未得從容龍歸石洞半山雨  
潮捲天風十里松春路泥深多滑馬樓居霧重只聞鐘  
荆公舊隱知何處回首蒼茫第幾重

過淮河

淮水清河水黃出門偶爾同異鄉排空捲雲若飛電隨  
風逐浪庸何傷東流入海殊不惡萬里同行有清濁

歲云暮矣

歲云暮矣子將焉之江南木落鴻雁飛娟娟美人淮水  
涯淮水去不止相思日千里

歲將暮矣夫將焉往燕山雪花大如掌娟娟美人淮水  
上淮水日夜流相思人白頭

過紫微庵訪道士二首

道士愛幽居年來一事無盆池新過雨石上種菖蒲  
研硃滴露清自點太玄經盡日無人到小窗蘭葉青

過高郵射陽湖雜詠

飄蕭樹梢風淅瀝湖上雨不見打魚人菰蒲雁相語  
秋風吹白波秋雨鳴敗荷平湖三十里過客感秋多  
雨濕鼓聲重風勻湖面平官船南北去帆影掛新晴  
霜落大湖淺漁家懸破罾此時生計別小艇賣秋菱

病中雜咏

為客家千里思歸月滿樓木犀開欲盡病裏過中秋  
風葉高下落秋砧遠近聞天涯多病客倚杖看孤雲

如夢曲哀燕將軍

芙蓉花為誰好洞房昨夜將軍老將軍老去空鐵衣  
漆  
燈照室人不歸

官錦袍攴帳高將軍夜酌涼蒲萄蒲萄力重醉不醒  
美人猶在珊瑚枕

海子頭誰家樓繡簾半捲風悠悠行人謂是將軍府  
將軍不來罷歌舞

平村曲春水綠將軍獵回曾此宿將軍一去成荒丘  
依

舊平村春水流

朝作樂暮作樂朝暮杯盤金錯落日欲盡東方明歡  
樂未已悲哀生

雪中渡江過山飲暘簡上人房

聞說山中新潑醅野人乘興過江來小窗無處看春色  
一樹梅花雪裏開

山酒吹香出小槽燈前痛飲污青袍夜深夢醒知何處  
老鶴一聲山月高

京口城南次集

野薺花開春欲盡  
山櫻子落雨初晴  
酒醒騎馬踏花去  
門外綠陰無數生

雨深綠葉櫻桃肥  
日長青草蝴蝶飛  
江南三月春欲盡  
白馬王孫遊不歸

憩奉真道院

落花風颺步虛聲  
碧草玄芝爛漫生  
過客不知春早晚  
午窗晴日睡聞鶯

宿化閣渡口阻風

江船日午無人渡  
渡口人家盡曝曬  
曾却憶吳姬新壓酒  
鍾山對岸是金陵

艇子渡江何日迴  
石頭城下浪如雷  
淮南春色知多少  
一樹櫻桃帶雨開

題界首驛

清氣撲人湖水幽  
聲到耳樹頭風  
人家蠶老櫻桃過  
恰似淮南四月中

渡淮即事

楊花點點衝帆過  
燕子雙雙掠水飛  
淮上漁人閒不得  
船頭對結綠蓑衣

還臺偶成

踏雪歸來過蚤春  
沈沈臺府隔紅塵  
東風吹綠青溪柳  
馬上輕寒不着人

題冶城道士嵇秋山卷

不見冶城嵇道士  
雲深無處訪仙蹤  
夜聞老鶴行枯葉



知在秋山第幾重

秋詞

清夜宮車出建章  
紫衣小隊兩三行  
石闌干畔銀燈過  
照見芙蓉葉上霜

送鏡中圓上人遊錢塘

西湖西畔三天竺  
古木蒼藤望欲迷  
遙憶道人禪榻夜  
月高霜落聽猿啼

過贊善庵

夕陽欲下行人少落葉蕭蕭路不分脩竹萬竿秋影亂  
山風吹作滿窗雲

將遊茅山先寄道士張伯雨

行騎白鹿訪茅君琪樹秋聲隔夜聞料得山中張外史  
開門先掃鶴巢雲

春日鎮陽柳溪道院

城外清溪出洞門道人歸去日長曛柳花滿地無人掃  
隔水遙看是白雲

過鎮陽城南觀音院

柳色暗藏溪上寺  
露華偏濕水邊僧  
門前掩映荷花滿  
出水遊魚夜戲燈

黃河舟中月夜

十丈雲帆拂斗杓  
星槎風急浪花飄  
夜深露冷銀河近  
卧看天孫織絳綃

阻風南露筋過羅漢寺登樓看山茶

野寺尋春酒未醒  
不知幾日過清明  
小欄干外東風急

一樹山茶落晚晴

入閩過平望驛和御史王伯循題壁

廣陵城裏別匆匆一去三山隔萬重  
日暮江東相寄憶欲臨秋水剪芙蓉

釣臺夜興

仙茶旋煮桐江水坐客遙分石壁燈  
風露滿松山月上夜深相對釣臺僧

早發釣臺

山頭鐘響不聞雞  
重露翻鴉滿樹啼  
艇子欲搖灘下過  
月輪偏在釣臺西

石林即事

三山幕府無公事  
多病郎官懶出門  
老鶴喚回童子睡  
石盆新雨長蘭孫

題屏風

海國夜涼星亂垂  
石林逋客未眠時  
滿簾月色吹輕霧  
白露無聲下竹枝

閩城歲暮

嶺南春早不見雪臘月街頭聽賣花  
海國人家除夕近  
滿城微雨濕山茶

彭城雜詠呈廉公亮僉事

亞父墳前春草齊  
楚王城上夕陽低  
黃鶯不解興亡事  
飛過海棠枝上啼

城下黃河去不回  
四山依舊畫屏開  
無人念得登臨意  
獨上將軍戲馬臺

何處春風燕子樓斷碑落日古城頭畫眉人遠繁華歇  
無數遠山生暮愁

歌扇搖風喚酒香舞裊斜日動攬黃柳邊今夜孤舟發  
水遠山遙空斷腸

京城立春

燕姬白馬青絲韁短衣窄袖銀鞵光御溝飲馬不回首  
貪看柳花飛過牆

雪中妃子

梁王宴罷下瑤臺窄窄紅靴步雪來疑是陽和三月暮  
楊花飛處牡丹開

次王叔能侍御史

龍蛇偃蹇出牆陰五色春雲態度深臺閣文章散清氣  
月明山館夜蕭森

醉起

楊柳樓心月滿牀錦屏繡褥夜生香不知門外春多少  
自起移燈照海棠



衰柳

清涼亭上幾株柳  
霜夜涼風下夕陽  
依舊明年二三月  
小金山上看鵝黃

過光孝寺

秋日留題翠壁層  
出山聊聽在山僧  
肩輿又上沙頭渡  
隔水人家兩岸燈

黃河

斗杓照水半垂天  
水氣漲天如白烟  
南北櫓聲爭上下

月中聞鼓避官船

沛尉蔣景山沛簿趙伯顏送余別去有懷

公子將軍兩少年繡衣白馬杏花天  
醉中送客歸城暮回首金溝月滿船

附廼賢詩

次韻元復初春思

凍樹回青陽羈禽競新哢喧喧人語浮  
稍稍春事動澄心絕芳華小睡足幽夢夢覺  
天宇新朝光集飛棟

其二

遠客芳草思湛湛天外舟坐令親知疏低徊此淹留古  
樹擢竒石清流匯芳洲素心諒有在胡不為茲遊

送邵元道

仲連匡世姿揮手却秦軍掩袂停白日登車抗浮雲射  
書誠草草孤城死生分辭榮敦厚俗矯抗離其羣

君督漕入京請諸中書命太常議封貞惠寅二  
真仙元祥因徵賦詩廟壁云

君不見瀟湘江上斑斑竹雨灑疎林淚痕綠又不見金谿縣裏兩嬋娟身化白金金賤復至今九疑山下大江西窅窕祠堂依古木仙居更有杜貞娥千古清風凜相續貞娥鬻餅東陽市厨人相挑憤嚙齒提刀夜斷賊奴頭勇烈真同丈夫子脫身竄匿來孟溪木食澗飲幽巖棲梵梵姊妹自相保天寒愁聽哀猿啼夜雨奔流溢山趾月黑溪深黯無底嗚呼雙娥同溺死玉骨藤纏高樹裏開元賢令銜餘哀築祠却傍蒼崖開悲風瀟瀟落山

葉精靈日暮猶歸來陳侯自是古靈後來作仙居民父  
母銜香赤脚禱龍湫秋日甘霖起枯朽去年飛章徹九  
門紫綾裁詔褒貞魂鸞車孔蓋蔽白日髣髴來謝朝家  
恩男兒堂堂軀七尺忍垢含羞汙簡冊何如惠淑雨真  
仙萬古千秋長廟食

錢塘留別康里丞相之會稽代祀

聖主臨軒授寶奩詞臣將命祀東南胥江湖上迎官舫  
禹穴雲開擁使驂萬里兼程何敢後四方專對每多慚

千官法仗遥相送始覺皇恩似海涵

使歸

白頭萬里喜來歸小院深深過客稀  
睡起無題閒錦橐春來多病怯羅衣  
流鶯亂蹴殘紅溜乳燕連穿散絮飛  
莫道山房渾寂寞卧聽村女學鳴機

附龍從雲詩

明皇春宮按樂圖

華清宮殿春沈沈宮門楊柳垂黃金  
玉環新度霓裳曲

曲聲酣動君王心融融汙體生春困芙蓉露白桃花嫩  
可憐飛燕在昭陽李白文章有遺恨樹頭花暖鶯啼早  
滿院嬪妃總含笑門外千官進入朝三郎沈醉不知曉  
漁陽回首飄胡塵花鈿委地徒霑巾

凌波曲

吳蠶入繭雙鴛綺繡縷團花金鳳尾昔時啼艷曉粧慵  
滿眼春嬌扶不起昔時解帶羅襪鬆玉尖微露生春紅  
翩翩白練輕舒卷箏籊初翻宮樣軟三尺春雲入手輕

一鉤新月凌波淺象床舞罷嬌無力雁沙踏破參差跡  
金蓮窄小不堪行獨倚東風玉階立

雪花曲

枯篁漠漠吹北風黃河水流凝不通大孫手持白鸞尾  
掃盡琪花舞碧空崑山玉碎瓊樓裂老龍起舞驚明月  
應是遊魂不覺寒醉吟紙帳春雲熱東家嬌娘厭桃李  
學繡宮花鎖窗裏冷袖擎來欲細觀隔簾火氣催成水

鶴骨笛




九臯聲斷楚天秋。玉頂丹砂一夕休。枯朽挽回生死調。  
淒清吹盡古今愁。魂歸遼海身如寄。曲破江城月滿樓。  
惆悵主人三弄罷。杳無消息到揚州。

美人紗帶

滿眼春嬌倚繡牀。玉鈎新綰藕絲長。鴛鴦機上舒晴雪。  
翡翠簾前蹴曉霜。拾翠不知羅襪潤。踏花猶隔繡韉香。  
幾回暗憶吹簫侶。背立東風詠鳳凰。

仙壇

碧壇纛影陰龍蛇騎鶴歸來棗似瓜  
仙語風前飄玉屑  
道衣天上剪雲霞  
寒潭六月猶無暑  
老木千年尚有花  
采藥青童來借問  
蒼烟起處是誰家



石倉歷代詩選卷二百四十